

- Tanquam majestas, cujus sit diva potestas.  
 Forma venustatis, vernantibus ordine pratis,  
 Aspectum nostrum tanquam varium tenet ostrum.
- 50 Jam rebus cunctis vivo sibi federe junctis,  
 Non solum terre bona scit Venus optima ferre:  
 Inmo vix ulla proprio caret igne medulla.  
 Dum gravius prurit, quod acerbius humet et urit,  
 Veris natura dispensat publica jura,
- 55 Succurrit rebus pulsis intemperiebus.  
 Vere cadunt rores, flant venti prosperiores,  
 Prata gerunt flores, adducunt ligna virores.  
 Aufert ergo mala plaudente Favonius ala,  
 Hinc generale bonum dat et expectabile donum.
- 60 Quod mala secludat, quod delitiis sibi ludat,  
 Dant elementa fidem, modo vivida, tristia pridem.  
 Tu simul adverte, pater ó meus, alme Ruberte,  
 Quamquam non rarum genus hoc sit delitiarum.  
 Permulti nempe scripserunt florida Tempe,
- 65 Letitias rerum, processus temperierum.  
 Nos quoque dicturi, que sint sua gaudia ruri,  
 Gaudia que montes, que servant denique fontes,  
 Gaudia quecunque sunt terrarum mariumque,  
 Inter dicenda, cum singula sint sine menda,
- 70 Non ignoremus que jactavit Polifemus,  
 Cantibus equoream mulcere parans Galatheam,  
 Et que cantasti, dum pauper amator amasti,  
 Sacraque de collo tibi canna pependit, Apollo.  
 Temperies verna produxit secla veterna,
- 75 Tempore mundus eo processit, ut est in Hebreo,  
 Nec tacet ipse Maro, quem credo fallere raro.  
 Hiberni menses deerant tum, si bene censes,  
 Vernaque jocundum reddebant secula mundum.  
 Ver sonat á vero, nisi forte superflua quero,
- 80 Vult quoniam vere, placet hoc sibi nomen habere.  
 Numquid et a Veneris dictum ver nomine reris?  
 Quod quicunque putat, nec in hoc sibi tramite nutat.  
 Denique mater ea sub lege viget Citharea,  
 Piscis enim pisce gaudet sub solibus hisce:
- 85 Jam coeunt eque pecudes, jumenta fereque.  
 Ut quid ego Frixi nondum sacra vellera dixi?  
 Que splendent sursum, mare non metuentia rursum.  
 Gaudet ibi Febus isdem sibi rite diebus;  
 Dum zodiacteam mediam tenet ille choream,
- 90 Purior aura venit, boream nova gratia lenit,  
 Incipit ipsa spei fructum lux alma diei.